



Lög SAMORKU

1. gr. - Heiti

Sambandið heitir SAMORKA. Starfssvæði þess er landið allt, en heimili og varnarþing er í Reykjavík.

2. gr. - Starfssvið og tilgangur

SAMORKA starfar á fjórum fagsviðum, þ.e. hitaveitna, raforkufyrirtækja, vatnsveitna og fráveitna. Tilgangur sambandsins er:

1. Að stuðla að framgangi sameiginlegra áhuga- og hagsmunamála félaga þess.
2. Að gæta hagsmuna félaga og koma fram fyrir hönd þeirra í málum, sem æskilegt er að þeir standi að sem einn aðili.
3. Að safna gögnum og upplýsingum, sem varða starfssvið SAMORKU og einstakra félaga þess.
4. Að efna til og taka þátt í mótum og ráðstefnum, þar sem fjallað er um sameiginleg mál félaga eða mál er varða einstök fagsvið sambandsins.
5. Að halda uppi tengslum og samskiptum við hliðstæð samtök og stofnanir, innlendar og erlendar, og veita stjórnvöldum og öðrum aðilum upplýsingar og um-sagnir.
6. Að stuðla að rannsóknum og miðla upplýsingum og fræðslu til félaga sinna og stjórnvalda.
7. Að bæta hag og öryggi notenda er tengjast veitukerfum félaga, m.a. með því að veita þeim hagnýtar upplýsingar.
8. Að stuðla að traustum og hagkvæmum rekstri þeirrar starfsemi sem félagar stunda.
9. Að standa fyrir og kynna sameiginlega sjónarmið við virkjun og nýtingu endurnýjanlegra orkulinda landsmanna.

3. gr. - Félagar

Félagar geta orðið þau fyrirtæki er annast vinnslu, flutning, dreifingu eða sölu á raforku, heitu vatni, hita-orku, neysluvatni eða starfsemi fráveitu. Fyrirtæki sem hafa rekstur á fleiri en einu fagsviði teljast einn félagi.

4. gr. - Upptaka félaga og aukafélaga

Óski nýr aðili upptöku sem félagi eða aukafélagi, skal hann senda stjórn SAMORKU skriflega umsókn um aðild.

Aukafélagar hafa rétt til setu á almennum fundum SAMORKU með málfrelsi og tillögurétt.

5. gr. - Upptaka heiðursfélaga

Að ósk eins eða fleiri félaga getur stjórn ákveðið að einstaklingar verði heiðursfélagar SAMORKU og skal slík ákvörðun vera einróma.

Heiðursfélagar hafa rétt til setu á aðalfundi með málfrelsi og tillögurétt.

6. gr. - Fundir

Aðalfundur:

Halda skal aðalfund fyrir 15. mars ár hvert. Á aðalfundi skal taka fyrir þessi mál og í þessari röð:

1. Kjör fundarstjóra og fundarritara.
2. Skýrslu stjórnar.
3. Ársreikning ásamt skýrslu endurskoðanda.
4. Fjárhagsáætlun.
5. Tillögur um lagabreytingar.
6. Tillögur um breytingar á samþykktum.
7. Tillögur kjörnefndar.
8. Kjör stjórnar, stjórnarformanns og endurskoðanda.
9. Kjör í kjörnefnd.
10. Önnur mál.

Aðrir fundur

Auka-aðalfund skal kalla saman, ef félagar, sem fara með minnst helming atkvæða, krefjast þess skriflega. Halda skal fundinn eigi síðar en 15 dögum eftir að slík krafa hefur borist stjórninni.

Fundi um tæknileg málefni skal halda árlega. Sameina má fundi einstakra fagsviða.

Aðra fundi og ráðstefnur skal halda samkvæmt ákvörðun stjórnar.

7. gr. - Fundarboðun

Aðalfund skal boða með bréfi eða símskeyti með minnst eins mánaðar fyrirvara. Aðra fundi má boða með skemmri fyrirvara, þó eigi skemmri en sjö dögum. Í fundarboði skal greina frá dagskrá fundar í meginatriðum.

Stjórn ákveður hvar aðalfundur skuli haldinn og hvenær, sbr. þó 6. gr. varðandi tímamörk.

8. gr. - Atkvæðisréttur

Við atkvæðagreiðslur fer atkvæðafjöldi hvers félaga eftir félagsgjöldum hans til SAMORKU á yfirstandandi starfsári og skulu atkvæði reiknuð þannig að hvert byrjað % í hlutfalli félagsgjalda gefur eitt atkvæði.

Aukafélagar og heiðursfélagar hafa ekki atkvæðisrétt.

9. gr. - Umboð

Hver félagi skal tilkynna stjórn SAMORKU skriflega, fyrir hvern aðalfund, hver eða hverjir fari með umboð hans og atkvæðisrétt. Nefna má til jafnmarga menn og félaginn hefur atkvæði. Nefni félaginn þannig til fleiri menn en einn, skal sérstaklega tekið fram, hvernig með atkvæðisréttinn skal farið.

Hætti tilnefndur fulltrúi störfum hjá félagi, skal félaginn nefna til nýjan fulltrúa, er störfum gegnir, það sem eftir er umboðstímabilsins, sbr. 1. málsgrein.

Með umboð geta aðeins farið starfsmenn eða stjórnarmenn félaga.

Félagi má ekki fela fulltrúa annars félaga að fara með atkvæði.

10. gr. - Atkvæðagreiðsla

Afl atkvæða ræður úrslitum mála nema annars sé getið í lögum þessum.

11. gr. - Kjörnefnd

Kjörnefnd skal kosin á aðalfundi og í hana eru einungis fulltrúar félaga kjörgengir. Starfstími hennar hefst er kjör hefur farið fram og lýkur er ný nefnd hefur verið kjörin, sbr. 6. gr. 9. tölulið. Í kjörnefnd eiga sæti fimm menn og skal að minnsta kosti einn vera frá hverju fagsviði. Nefndin kannar hverjir sækja aðalfund og hverjir hafa atkvæðisrétt og gefur um það skýrslu til fundarins. Nefndin gerir tillögur til fundarins um kjör til stjórnar og kosningu endurskoðanda.

12. gr. - Stjórn og nefndir

Aðalfundur kýs sjö menn í stjórn, formann sem kosinn skal sérstaklega, sex meðstjórnendur, sem kosnir skulu sameiginlega, og þrjú varamenn sem einnig skulu kosnir sameiginlega. Meðal stjórnar- og varamanna skal vera að minnsta kosti einn frá hverju fagsviði og allir úr hópi starfsmanna félaga. Félög sem greiða yfir 15% af heildar árgjöldum til SAMORKU, miðað við næstliðið starfsár, skulu hafa rétt til að tilnefna einn stjórnarmannanna sjö, auk sérstaks varamanns viðkomandi stjórnarmanns, sem komi ekki úr hópi fyrrnefndra þriggja varamanna. Séu báðir fulltrúar viðkomandi félags forfallaðir á stjórnarfundum á viðkomandi félag rétt á að senda áheyrnarfulltrúa á fundinn, en varamaður með atkvæðisrétt komi úr hópi annarra varamanna í stjórn. Ennfremur skal tryggja að a.m.k. einn aðalmaður og einn varamaður í stjórn komi úr hópi smærri veitufyrirtækja sem greiða innan við 1% af heildar árgjöldum til SAMORKU. Ekki má kjósa fleiri en tvo stjórnarmenn frá sömu fyrirtækjasamstæðu.

Kjörtímabil stjórnarmanna skal vera tvö ár. Formaður skal að jafnaði ekki sitja lengur samfellt en fjögur ár og aldrei lengur en í sex ár.

Hverfi maður úr stjórn innan árs frá kjöri hans skal þá kjósa annan í hans stað á næsta aðalfundi til eins árs.

Á stjórnarfundum fer hver maður með eitt atkvæði. Verði atkvæði jöfn skal hlutkesti ráða. Varamaður skal sitja

stjórnarfundum í forföllum stjórnarmanns, en tvisvar á ári skulu allir aðal- og varamenn boðaðir til stjórnarfundar. Stjórnin skiptir sjálf með sér verkum á fyrsta stjórnarfundum eftir aðalfund og kýs sér varaformann, ritara og gjaldkera.

Innan SAMORKU skulu starfa Ráðgjafaráð veitufyrirtækja og Ráðgjafaráð orkufyrirtækja. Ráðin skulu skipuð forsvarsmönnum veitufyrirtækja og orkufyrirtækja eða þeim fulltrúum sem þeir tilnefna í sinn stað til að taka þar sæti. Ráðgjafaráðin fjalla um hagsmunamál veitufyrirtækja og orkufyrirtækja og eru stjórn samtakanna til ráðgjafar um málefni þeirra.

Þá skulu starfa innan samtakanna fjögur fagråd, eitt fyrir hvert fagsvið samtakanna. Á fyrsta fundi nýkjörinnar stjórnar tilnefnir hún fulltrúa í fagráðin. Í hverju fagráði skulu sitja að jafnaði fimm fulltrúar.

Til viðbótar framangreindum fastaráðum SAMORKU er stjórn er heimilt að skipa önnur ráð og hópa til að vinna að afmörkuðum málefnum eða tímabundnum verkefnum.

Öll ráð og hópar skulu setja sér erindisbréf eða hlutverkalýsingu.

Starfskjör stjórnarmanna ákveðast af aðalfundi.

13. gr. - Endurskoðandi

Löggiltur endurskoðandi, sem kosinn er á aðalfundi, endurskoðar reikninga og skilar um þá skýrslu til stjórnar, eigi síðar en tveimur vikum fyrir aðalfund.

14. gr. - Stjórnarfundir

Stjórnarfundir skulu haldnir, er formaður eða meiri hluti stjórnar óskar. Formaður boðar fundi stjórnar. Stjórnarfundur er því aðeins lögmætur að formaður eða varaformaður og minnst þrjú meðstjórnendur sækir fund. Stjórnin heldur gerðabók um störf sín.

15. gr. - Störf stjórnar

Stjórn SAMORKU fer með málefni sambandsins milli aðalfunda.

Stjórnin ræður framkvæmdastjóra, en hann annað starfslið að fengnu samþykki stjórnar. Stjórnin setur þeim skriflegar starfsreglur og ákveður þeim laun.

Framkvæmdastjóri annast daglegan rekstur sambandsins og situr stjórnarfundum með málfrelsi og tillögurétt nema fjallað sé um mál sem varða hann persónulega.

16. gr. - Ársreikningur

Reikningsár skal vera almanaksárið.

Framkvæmdastjóri semur ársreikning SAMORKU og kemur honum með hæfilegum fyrirvara til þess löggilta endurskoðanda sem kjörinn var á næstliðnum aðalfundi. Að lokinni endurskoðun afhendir framkvæmdastjóri ársreikning ásamt skýrslu hins löggilta endurskoðanda stjórn til samþykktar. Ársreikningurinn skal sendur félögum fyrir aðalfund og lagður fyrir hann til staðfestingar ásamt skýrslu löggilta endurskoðandans.

17. gr. - Félagsgjöld

Aðalfundur ákveður, að fengnum tillögum stjórnar, aðildargjöld félaga og gjaldstofn samkvæmt fjárhagsáætlun. Aðildargjöld reiknast sem hlutfall af tekjum af starfsemi raforkufyrirtækja, hitaveitna, vatnsveitna og fráveitna, á síðasta almanaksári, að frádrögnum virðisaukaskatti og öðrum opinberum gjöldum er reiknast beint á orku- eða vatnsverðið. Aðildargjöld reiknast einungis af veltu þeirrar starfsemi sem viðkomandi félag sinnir, ekki af veltu dótturfélaga. Aðalfundur ákveður lágmarks- og hámarksupphæð eða hlutfall félagsgjalda hvers félaga. Skal það endurskoðað árlega í tengslum við gerð fjárhagsáætlunar.

Hver félagi skal fyrir 15. maí, ár hvert, senda stjórn SAMORKU sundurliðaða skýrslu um heildartekjur næsta ár á undan sbr. 1. málsg. Berist skýrslan ekki á réttum tíma, skal stjórnin áætla heildartekjurnar. Aðalfundur ákveður félagsgjöld aukafélaga, að fengnum tillögum stjórnar.

Félagsgjöld skulu innheimt í tvennu lagi og skal fyrri hluti þeirra falla í gjalddaga 15. febrúar ár hvert og seinni hluti þeirra 15. júlí ár hvert.

18. gr. - Skuldbinding sambandsins

SAMORKA eða stjórn þess getur ekki skuldbundið sambandið umfram það, sem segir í gildandi fjárhagsáætlun sbr. 6. gr.

Til að skuldbinda SAMORKU þarf undirskrift stjórnarformanns og þriggja stjórnarmanna, en stjórnin getur veitt færri stjórnarmönnum svo og mönnum utan stjórnar umboð til að skuldbinda sambandið þegar sérstaklega stendur á.

Stjórnin veitir prókúruumboð fyrir sambandið og skal framkvæmdastjóri hafa slíkt umboð. Prókúruumboð skulu skráð.

Sambandið ber ábyrgð á skuldbindingum sínum með tekjum sínum og eignum.

19. gr. - Úrganga og brottvikning

Kjósi félagi að ganga úr SAMORKU ber að tilkynna stjórn skriflega um úrsögnina og tekur hún þá gildi tólf mánuðum síðar, við lok þess mánaðar. Þó er hvorki heimilt að segja sig úr samtökunum né fara úr þeim á meðan vinnudeila sem snertir hlutaðeigandi aðildarfélag stendur yfir.

Gerist félagi brotlegur við lög eða reglur SAMORKU, t.d. með því að vanrækja greiðslu á félagsgjaldi í 6 mánuði eða meira, má víkja honum úr sambandinu.

Stjórnin tekur ákvörðun um brottvikningu, ef um aukafélaga er að ræða, en til þess að víkja félagi úr SAMORKU, verður slík tillaga að vera samþykkt með minnst 3/4 allra atkvæða félaga sem fara með atkvæði á aðalfundinum

Aðvörun um slíka tillögu skal senda hlutaðeigandi í ábyrgðarbréfi með a.m.k. eins mánaðar fyrirvara.

20. gr. - Lagabreytingar

Um breytingu á lögum þessum skal fara fram skrifleg atkvæðagreiðsla á aðalfundi. Breytingartillögu skal kynna félögum minnst einum mánuði fyrir fundinn. Afl atkvæða ræður úrslitum, en atkvæðagreiðsla er þó því aðeins gild, að minnst 3/4 allra atkvæða félaga sem fara með atkvæði á aðalfundinum hafi verið greidd.

21. gr. - Upplausn SAMORKU

Tillögu um upplausn SAMORKU skal leggja fram á sama hátt og hún fá sömu afgreiðslu og um laga-breytingu væri að ræða, þó þannig, að tillögunu skal ræða á tveimur aðalfundum.

Hafi slík tillaga hlotið samþykki, skal hrein eign sambandsins ganga til þáverandi félaga þannig að upphaflegt stofnfé, framreiknað fyrir áhrifum almennra verðlagsbreytinga, endurgreiðist félögunum. Það eigið fé sem sambandið á umfram framreiknað stofnfé greiðist til þáverandi félaga í sömu hlutföllum og greiðsluhlutföll félagsgjalda segja til um. Sé eigið fé sambandsins lægra en framreiknað stofnfé skerðist endurgreiðsla um mismuninn. Skerðingin á framreiknað stofnfé skiptist á milli þáverandi félaga í sömu hlutföllum og greiðsluhlutföll félagsgjalda.

22. gr. - Gildistaka

Lög þessi taka gildi á stofnfundi.

Samþykkt á stofnfundi 13. desember 1994

Breytt á 2. aðalfundi 14. mars 1997

Breytt á 3. aðalfundi 13. mars 1998

Breytt á aðalfundi 10. mars 2000

Breytt á aðalfundi 11. mars 2005

Breytt á aðalfundi 10. mars 2006

Breytt á aðalfundi 9. febrúar 2007

Breytt á aðalfundi 18. febrúar 2011

Breytt á auka-aðalfundi 16. október 2015

Breytt á aðalfundi 2. mars 2017

Breytt á aðalfundi 6. mars 2018